

V E N D I M
Nr.129, datë 15.3.2001

**PËR PËRFAQËSIMIN E REPUBLIKËS SË SHQIPËRISË NË QENDRËN RAJONALE TË
NISMËS SË BASHKËPUNIMIT PËR EUROPËN JUGLINDORE (QENDRA SECI), PËR
LUFTËN KUNDËR KRIMIT NDËRKUFITAR**

Në mbështetje të nenit 100 të Kushtetutës, të neneve 8 dhe 13 të “Marrëveshjes së SECI-t për bashkëpunimin për parandalimin dhe luftën kundër krimit ndërkufitar”, të ratifikuar me ligjin nr.8541, datë 21.10.1999, të pikave 5.1 (5.1.3) dhe 5.2 (5.2.3), të “Kartës për organizimin dhe funksionimin e qendrës rajonale të nismës së bashkëpunimit për Europën Juglindore (Qendra SECI), për luftën kundër krimit ndërkufitar”, të ratifikuar me ligjin nr.8639, datë 13.7.2000, të ligjit nr.8371, datë 9.7.1998 “Për shërbimin e jashtëm të Republikës së Shqipërisë”, të ligjit nr.8379, datë 29.7.1998 “Për hartimin dhe zbatimin e buxhetit të shtetit në Republikën e Shqipërisë” dhe të ligjit nr.8718, datë 19.12.2000 “Për buxhetin e shtetit të vitit 2001”, me propozimin e Ministrit të Financave dhe të Ministrit të Rendit Publik, Këshilli i Ministrave

V E N D O S I:

1. Përfaqësimin e Republikës së Shqipërisë në Qendrën Rajonale (SECI) të luftës kundër krimit të organizuar ndërkufitar, me seli në Bukuresht, Rumani, të krijuar në kuadër të nismës së bashkëpunimit të Europës Juglindore, më 1 nëntor 2000.

Përfaqësimi të realizohet me dy punonjës (nëpunës ndërlidhës), të cilët të emërohen njëri nga Ministri i Financave dhe tjetri nga Ministri i Rendit Publik, me propozimin e Drejtorit të Përgjithshëm të Doganave dhe të Drejtorit të Përgjithshëm të Policisë së Shtetit.

2. Emërimi i nëpunësve ndërlidhës përkatësisht nga Ministri i Financave dhe Ministri i Rendit Publik, bëhet në përputhje me kriteret e përcaktuara në rregulloret e brendshme të Qendrës Rajonale (SECI).

3. Nëpunësit ndërlidhës të emërohen për një periudhë të përcaktuar shërbimi, më e pakta dy vjet, dhe emërimi i tyre t’i njoftohet zyrtarisht Sekretariatit të Përgjithshëm të qendrës Rajonale (SECI).

4. Nëpunësit ndërlidhës, gjatë veprimtarisë së tyre në këtë Qendër, janë dhe mbeten organikë e institucioneve që i emërojnë. Në përfundim të misionit të tyre, nëpunësit ndërlidhës gëzojnë të drejtën e rikthimit në institucionin ku kanë punuar para emërimit në këtë detyrë.

5. Nëpunësit ndërlidhës, gjatë veprimtarisë së tyre në Qendrën Rajonale (SECI), përfaqësojnë dhe mbrojnë interesat e Republikës së Shqipërisë, duke ruajtur respektivisht karakteristikat dhe cilësitë e nëpunësit specialist doganor dhe të punonjësit të Policisë së Shtetit.

6. Statusi, imuniteti dhe privilegjet që gëzojnë nëpunësit ndërlidhës gjatë ushtrimit të veprimtarisë së tyre në Qendrën Rajonale (SECI) rregullohen në përputhje me “Marrëveshjen bazë (Headquarters Agreement) të nismës së bashkëpunimit të Europës Juglindore dhe Rumanisë”, nënshkruar më 2 tetor 2000, ndërmjet Komitetit të Përbashkët të Bashkëpunimit të Qendrës Rajonale (SECI) dhe qeverisë rumune, si dhe në përputhje me legjislacionin përkatës, kombëtar.

7. Nëpunësit ndërlidhës, në vend të pagës, marrin alokacione në valutë, të cilat përllogariten në bazë të rëndësisë së veçantë të Nismës së Bashkëpunimit të Europës Juglindore, në bazë të mbështetjes politike që gëzon ajo nga partnerët euroatlantikë, të statusit të organizmit ndërkombëtar të Qendrës (SECI) dhe të rekomandimeve të Komitetit të Përbashkët të Bashkëpunimit të kësaj Qendre.

Alokacionet janë në përpjestim me suksesin dhe rreziqet që mbart lufta kundër krimit të organizuar ndërkufitar.

8. Masa e alokacioneve për nëpunësit ndërlidhës paraqitet në lidhjen nr.1, e cila i bashkëlidhet këtij vendimi dhe përbëhet nga alokacioni individual dhe shtesa për profesionin. Përveç alokacioneve, nëpunësit ndërlidhës përfitojnë dhe prime motivuese, vlera e të cilave bazohet në meritat individuale dhe në nivelin e realizimit të detyrave. Sistemi i pagesës së parimeve do të jetë ai që zbatohet nga secila prej administratave përkatëse.

9. Nëpunësit ndërlidhës, bashkëshortët dhe fëmijët në ngarkim, gjatë veprimtarisë së tyre në Qendrën Rajonale (SECI) dhe në lidhje me të, nëse nuk përcaktohet ndryshe këtu, gëzojnë të gjitha të

drejtat dhe përfitimet që parashikon ligji nr.8370, datë 9.7.1998 “Për shërbimin e jashtëm të Republikës së Shqipërisë”, dhe aktet nënligjore, në zbatim të tij.

10. Për efekt të zbatimit të pikës 9 të këtij vendimi, nëpunësi ndërlidhës barazvlerësohet me gradën e këshilltarit të përfaqësisë diplomatike.

11. Efektet financiare të këtij vendimi përballohen nga fondet jobuxhetore të Drejtorisë së Përgjithshme të Doganave për njërin punonjës dhe për tjetrin nga fondet buxhetore të Ministrisë së Rendit Publik.

12. Ngarkohen Ministria e Financave dhe Ministria e Rendit Publik për nxjerrjen e një udhëzimi të përbashkët për ngritjen dhe funksionimin e pikës së vetme kombëtare të kontaktit të parë, për realizimin e shkëmbimit të informacionit me Qendrën Rajonale (SECI), jo më vonë se 30 ditë nga hyrja në fuqi e këtij vendimi.

13. Në organikën e Drejtorisë së Përgjithshme të Doganave dhe të Drejtorisë së Përgjithshme të Policisë së Shtetit shtohet funksioni “nëpunës ndërlidhës”.

Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta

LIDHJA 1

STRUKTURA E PAGËS SË NËPUNËSIT NDËRLIDHËS NË QENDRËN RAJONALE TË NISMËS SË BASHKËPUNIMIT TË EUROPËS JUGLINDORE (QENDRA SECI) PËR LUFTËN KUNDËR KRIMIT NDËRKUFITAR

Varianti 1:Pagesa e nëpunësve ndërlidhës financohet pjesërisht nga Qeveria e SHBA (50%:50%)

EMËRIMI	ALOKACIONI MUJOR I PAGUESHËM				
	ALOKACIONI INDIVIDUAL (NË USD)			SHITESA PROFESIONALE (NË USD)	
	Baza	Shtesa për vjetërsi në %	Shtesa për kualifikim në %	Shtesa për funksion në vlerë	Shtesa për kushte pune në vlerë
Nëpunës ndërlidhës	400	2% e bazës për çdo vit pune	50-100	200	300

Varianti 2: Pagesa e nëpunësve ndërlidhës përballohet nga shteti shqiptar

EMËRIMI	ALOKACIONI MUJOR I PAGUESHËM				
	ALOKACIONI INDIVIDUAL (NË USD)			SHITESA PROFESIONALE (NË USD)	
	Baza	Shtesa për vjetërsi në %	Shtesa për kualifikim në %	Shtesa për funksion në vlerë	Shtesa për kushte pune në vlerë
Nëpunës ndërlidhës	800	2% e bazës për çdo vit pune	50-100	400	600